

Date – 23/12/2025

Time - 7:30 -7:40 Hrs

AKASHVANI AIZAWL
REGIONAL NEWS BULLETIN
HEADLINES (MORNING)

1. Chief Minister Pu Lalduhoma chuan, ram danga Mizo thalaite hnathawka an chhuak chu lawmawm a ti a, vak chhuak pawh tun aiin tam deuh deuh se a duh tih a sawi bawk.
2. Social Welfare Minister Pi Lalrinpuii chuan upate chu ram leh khawtlang innghahna an nih thu a sawi.
3. Prime Minister Narendra Modia chuan Indie leh New Zealand ten Free Trade Agreement an ziah chuan ram pahnih sumdawntawnna kum nga chhungin a letin a ti lian dawn a ti.
4. Thlaruk chhungin sawrkarin cheng vaibelchhe 660 chuang hu internet hmanga inbum tumna a manchhuak

<><><>

CM

Chief Minister Pu Lalduhoma chuan, ram danga Mizo thalaite hnathawka an chhuak chu lawmawm a ti a, vak chhuak pawh tun aiin tam deuh deuh se a duh tih a sawi bawk.

Nimin khan Mizo Diaspora Cell, Chief Minister Office chuan Media platform hrang hrang Influencer thenkhatte CM Conference Hall-ah thingpui an inpui a. Chief Minister Pu Lalduhoma chuan, Mizo thalaite ei zawngin vak chuak tam se a duh a, chutihlaiin, dan lova mi an vah chhuah hian an va awmna rama harsatna an tawhin sorkar an rawn bel lo thei lova, in lakchhuah a har tawh thin si a ti a. Dan ang taka an kal zel chu an duh ber a, Chu mi kawngah chuan theih tawpin hma kan la tih sawiin, hemi kawngah hian social media hmang thinte chu midang hrilh hre ve turin a sawm bawk.

Mizo Diaspora Cell hian influencer thenkhat, Christmas hmanga lo haw te hun remchang zawngin chawpchilh deuh takin thingpui inhona hi a buatsaih a, hei hi a bul tanna a ni. Accredited Journalist te, kohhran thalai leh social media lama mi hlawhtling dangte pawh la sawm zel an tum a ni.

DIPR

<><><>

Lai Autonmymous District Council inthlanpui, tunthla Ni 3 a neih chu Sorkar din turin ruahmanna kalpui mek niin, nimin khan Protem Chairman leh Member of District Council atana thlante rinamwna thu tiamtir an ni.

Mizoram Governor-in LADC-ah Sorkar dintura hmalakna a kalpui mekah Protem Chairman atan a ruat, Lawngtlai Council Veng bial atanga MDC atan thlantlin Pu Lallura Chinzah chu nimin khan LADC Hall, Lawngtlaiah, Lawngtlai Bawrhsap Pu Donny Lalruatsanga chuan rinawmna thu tiamtirin a lalut a.

Hemi hnu hian Protem Chairman Pu Lallura Chinzah chuan LADC Term 12-na a MDC atan thlan tharte chu rinawmna thu a tiamtir nghal a, Bial Number khatna Sangau East atanga thlantlin in hma hruaiin, Bial Number 25 nan Vathuampui bial atanga thlantlin in hnu a khar.

Chanchin buatsaihlai thleng hian LADC ah Sorkar siamtuma hmala mek, ZPM leh MNF inkawp Member 14 awmna Lairam Legislature Party hruaitu, ZPM Member Pu T. Zakunga'n Mizoram Governor hnenah Sorkar an siamtheih thu leh thlawptu a ngah tawk thu a thlen chu chhanna hriat a la nilova, tun dinhmunah chuan sawilawk theih ni lo mah se, Krismas hmian LADC-ah Chief Executive Member a fel hman dawn leh dawn loh hriat a ni lo.

<><><>

WELFARE MINISTER

Social Welfare Minister Pi Lalrinpuii chuan upate chu ram leh khawtlang innghahna an nih thu a sawi.

Pi Lalrinpuii hian nimin khan Lunglei Convention Centre-ah upate dinhmun leh harsatna zir hona, "One day Workshop on Elderly Issues" hun a hmanpui a. Minister chuan, upate chu hnam nunphung, hlutna leh finnate vawng nungtu leh thangtharte hnena hlan chhawngtu an nih thu a sawi a, Khawvel inthlak danglam zelah upate'n hriselna lama harsatna te, nun khawharna leh an dikna leh chanvo hriat tawk lohna avanga harsatna hrang hrangte an tawk thin tih sawiin, chu'ng an harsatnate chu sut kianpui turin sawrkar leh khawtlang tang ruala hma lak leh inzirtir a tul thu a sawi bawk.

He hun hi Regional Resource Training Centre (RRTC) for Senior Citizens, Mission Foundation Movement (MFM) buatsaih niin, Lunglei veng hrang hrang Mizo Upa Pawl (MUP) unit 24 atangin member 267-in an chhim a ni.

RRTC for Senior Citizen hi India sawrkar Ministry of Social Justice & Empowerment hnuaia awm niin, MFM hi Implementing Agency a ni a. Mizoram, Assam, Arunachal Pradesh leh Meghalaya te an enkawl mek a ni.

<><><>

ADVANCE KRISMAS

Nizan khan Mizorama kohhhran hrang hrang thalaite chuan Kirsmar Urlawkna hun an hman a, Biak In, Kohhhran Hall leh hmun remchang laiah hun nuam leh hlimawm tak an hman.

Krismas thlen hma Thawhtahnni zan hnunung ber a nih avangin, thalai inkhawm tam zawk chuan Krismas Urlawkna hun hi hmangin - Pathian thu an ngaihthlak bakah zai leh lamin an intihlim a ni.

Mizoram Sorkar, Kohhhran leh Khawtlang chu Krismas hmang turin a inpuahchah nasa hle a, inbuatsaihna hian a vawr tawp a thleng chho tawh. Aizawl khawpuiah chuan vawiin hian Lirthei tlan phal lohna hmun 'No Vehicle Zone' buatsaih a ni leh ang.

<><><>

LABOUR CODE

Sorkar Laipuiin inhlawhfate tana dan thar a siam, Labour Code chu Mizorama mimal hnuaia inhlawhfate'n tha an tih thu an sawi.

Akashvani Aizawl zawhna chhangin Aizawla private company pakhat hnuaia thawk Pu Victor-a chuan sorkar laipui hmalaknaa Labour Code 29 awm thin 4-a khaikhawm a ni chu ram chhunga inhlawhfa thinte tan a tangkai dawn hlea a hriat thu a sawi a, a bikin inhlawhfa inchhawrna mumal awm lova thawk thinte tan chuan tha lehzuala a hriat thu sawiin, an hlawh chungchang bakah hamthatna felfai tak awm tur te chu hnathawktute chuan an chhawr dawn hlea a hriat thu a sawi a ni.

Sawrkar laipui chuan November ni 21 khan ram chhunga inhlawhfate tana dan thar labour code chu a taka hman tan turin a puang a. He dan thar hian kum tam tak lo hman tawh labour law hlui chu awlsam leh huapzo zawkin a siam a, nitin inhlawhfa chawpa eizawngte tan hlawkna zau zawk thlen thei tura duan a ni a, Mizoram sorkar a Labour, Employment Skill Development & Entrepreneurship Development hotute chuan he dan thar hi Mizoram ah pawh hman vat a nih theih nan hma an lak thu an lo sawi tawh a, Labour Code thar hnuaiah hian hnathawka mi chhawr tuten hriselna lam kaihhnawih health insurance eng emaw chen an tumsak tur a nih bakah hnathawktute dinhmun chawikanna tur a awm nual thu te, mi tupawh mimal dawr emaw thil siamchhuahna hmun nei emaw chuan an hnathawkte appointment letter felfai tak an pek ve a ngaih tawh dawn thu a sawi a. Kum khata ni 180 thawk chin te chu hlawh kiam chuang lova chawlh (paid leave) an neih theihna tur te, hmeichhia leh mipa hlawh inang te, zan lama hmeichhia te hna an thawh theihna tur te leh hriselna kawnga a chhawrtute mawhphurhna hrang hrang Labour Code tharah a tel thu LESDE hotute chuan an lo sawi tawh a ni.

<><><>

OPHTHALMOLOGIST

Naupangten mit hrisel zawk an neih theih nan inchhungah phone khawih lova pawna thiante nen infiam tir a pawimawh hle tih mithiamte'n an sawi.

Akashvani Aizawl in Civil Hospital Eye Department-a HoD Dr Lalhuthangi Hmar a kawmnaah he thu hi sawiin, tunlaia mit lam harsatna tawh an buaipui tam ber chu tarmit chawh ngai an ni deuh vek tih sawiin, nitin Civil Hospital OPD ah mit tha lo 100 vel an en ziah tih sawiin, heng zinga zaa 40 vel chu tarmit chawh ngai an ni thin a ti a, school chawlh laia naupang mit inentir tam zawh pawh tarmit vuah ngai an ni chu pawh a ti hle tih sawiin naupang ten phone an en nasat lutuk chuan mitmu a thang vak a, tarmit minus power hmanga lo siamthat a ngai thin a ti a, mithiamte chuan naupangin inchhungah phone emaw TV leh gadgets dang emaw khawih ngut ngut lova pawnah thiante nen an infiam chuan a tarmit power minus 5 a pung tur kha a veng thei tih an sawi a ti a, naupang ten mit hrisel zawh an neih theih nan hmanlai nun dan anga kir leh a, naupangte chu inchhungah khung lova an thiante nen zalen taka pawna infiam tir a pawimawh hle tih a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

FTA

Prime Minister Narendra Modia chuan Indie leh New Zealand ten Free Trade Agreement an ziah chuan ram pahnih sumdawntawna kum nga chhungin a letin a ti lian dawn a ti. Puan tawh angina nimin khan India leh New Zealand te chuan sumdawna lama inremna Free Trade Agreement (FTA) an ziah thu hi an puang a. Pu Modia chuan telephone hmangin PM Luxon hi bia in FTA chungchang hi an sawidun a. Kumin March thlaa New Zealander PM Luxon-an India a lo tlawh tuma ram pahnih indawrna bawhuina kalzel a ni a. New Zealand atanga sumdawna dollar tluklehdingawn 20 chuang hu Indiaa rawn lut tur chu lawmawm atih thu social media ah a tarlang bawh a ni.

<><><>

CYBER FRAUD

Thlaruk chhungin sawrkarin cheng vaibelchhe 660 chuang hu internet hmanga inbum tumna a manchhuak. Union Ministry of Communication sawidanin Financial Risk Indicator (FRI) hmangin heng inbumna te hi lo ven a ni a. Bank sangkhat chuang bakah internet kaltlanga pawisa chet velna third party application providerte leh Payment System Operator te chu Digital Intelligence Platform (DIP) zawm tura tih an nih bakah FRI chu hmang tan tura tih an ni a. Reserve Bank of India leh National Payment Corporation of India te chuan FRI hi nasa takin an pui a. Heng bakah hian mipuite fimkhurna zarah leh hetiang lam veng tura theihtawp chhuahten

Sanchar Saathi platform kaltlanga inbum tumna nia rinhlelh an hrilh zung zung
avangin sum tam tak hum a ni a ti b awk.

<><><>